

I tanti «pensieri» del castel de Momian

(El testo riporta i pensieri de do fioi de 6 ani sul castel de Momian)

A Momian xe un castel, per andar vederlo bisogna andar fina ala cesa, la' xe una casa e vizin una strada che porta fina davanti al castel.

El castel i lo gavara' costruito i muradori con le piere, una su l'altra e i le ga incola' col zemento. I meteva anche fango e acqua. Le piere i le portava con la cariola e i le alzava su con la carucola.

I gaveva 100 operai. I lo ga fato in 100 ani. El ponte invezze i lo ga fato col legno; el se alzava su con le cadene. Per verzerlo bisognava dir la parola magica: «Per favor»

El xe quadrato ma tuto roto. I muri xe de piera. Nol ga le finestre. Xe tuto erba, ma xe anche la tore, la serviva per rampigarse.

La principesa e el re i se rampigava per veder i usei.

Anche le guardie le andava sula tore, ma solo quando i doveva combater. Le guardie guardava col canocial in zima ala tore, se vegniva el drago a ciapar la principesa.

I gaveva i cavai e anche i canoni, e anche la spada.

Nel castel stava i cavalieri e i conti Roti, anzi no, i conti Rota!

I servi ghe fazeva i dolci. I cusinava anche el brodo. I gaveva la cusina e i gaveva tanto gas e le bombole per far de magnar a tuti. I magnava sul trono.

I gaveva la camera per dormir col leto morbidoso come le nuvole!

I gaveva i cusini e le coverte perche' fazeva fredo; le iera de lana de piegore.

La camera iera grandissima e anche el leto iera grande, de legno.

Noi gaveva el bagno, coi fazeva le scoresete, i andava fora. Per lavarse, l'acqua calda i la scaldava con tante candele; 100 candele!

L'acqua no ghe vegniva fora dala spina ma i la andava a cior in tel
Quieto con i seci. I se lavava fora.

I se alzava presto, i magnava e i andava a lavorar. I fazeva tanto
oio e dopo i andava in giro, a beber cafe', a magnar el gelato a
Cittanova e i pasava el tempo giogando le carte. I andava anche al
mar, con la carozza. I andava a far el bagno dove che vado mi.

El castel se ga roto perche' i se bateva coi martei, e i muri
se ga tuti squaia. I paroni noi lo voleva riparar perche' i xe morti,
pero' deso i lo ripara' e cusi se lo podara' andar veder.